

Ndaej Gaijbienq Haenx Dwg Daidu

可以改变的是态度

Miz boux buzgeq he cingj boux canghdazyouzaet he daengz ndaw ranz daz ciengz.

Boux canghdazyouzaet byaij haeuj ranz, raen gvan buzgeq song da fangz, sawqmwh couh roxnyinh gyoengqde miz di hojlienx. Hoeng goenggeq simvuen sim'angq, ndigah canghdazyouzaet guhhong geij ngoenz haenx, songde gig gangj ndaej daeuj, canghdazyouzaet hix mbouj dwen gvaq goenggeq dafangz.

Ciengz daz sat le, canghdazyouzaet dawz ok mbaw dan gyaqcienz daz youzaet haenx, buzgeq raen beij gij gyaqcienz yienzlaiz gangj haenx noix le haujlai. De cam canghdazyouzaet: "Baenzlawz noix baenz lai ha?"

Canghdazyouzaet naeuz: "Gou caeuq goenggeq youq doxcaez gig angq, gij daidu de doiq ciuhvunz de, sawj gou roxnyinh gij cingzgvang gou lij mbouj suenq daiq yaez. Ndigah gemj bae dingz he, suenq dwg gou doiq de biuji di docih he, aenvih de sawj gou mbouj caiq aeu gij hong gou yawj ndaej daiq sinhoj!"

Buzgeq raemxda doek lo. Aenvih boux canghdazyouzaet daihfueg neix, de swheij cij miz gaiq fwngz he.

Yienznaeuz raeuz mbouj miz banhfap gaijbienq ciuhvunz raeuz, hoeng raeuz ndaej gaijbienq yinzswngghvanh raeuz; yienznaeuz raeuz mbouj miz banhfap gaijbienq vanzging, hoeng raeuz ndaej gaijbienq simcingz

raez; yienznaeuz raeuz mbouj miz banhfap diuzcingj vanzging daeuj cienzbouh habwngq gwndaenj raeuz, hoeng ndaej diuzcingj daidu daeuj hab'wngq sojmiz vanzging.

Bitgingq, gij gwndaenj mwngz mbouj dwg cienzbouh youz gij saeh fatseng haenx daeuj gietdingh, cix dwg youz gij daidu mwngz mienhdoiq saehcingz haenx daeuj gietdingh.

(fouz mingz)



Gienq Dahnuengx

劝说妹妹



"Gou imq lo, gij haeux neix gou mbouj gwn lo!" Coenz vah neix youh yiengj youq henz rwz gou. Coenz vah neix mbouj rox dahnuengx gangj geijlai baez lo, gou baezbaez cungj gangj "mbouj ndaej sai haeuxgwn", hoeng de gaenbonj mbouj geiq ndaej. Yawjdaej baez neix yaeq saek haeuj aenrwz de bae cij ndaej lo.

Gou huj dwk rag de daeuj henz daizhaeux.

"Mwngz guh gijmaz ha?" Dahnuengx mbouj naihfanz dwk naeuz.

Gou ndwn youq baihnaj de, fwngzswix caphwet, fwngzgvaz vix de naeuz: "Gou caiq gangj baez he, gwn haeux yaeq gwn liux bae! Lw di neix, duzmoed cungj gwn ndaej liux!" Dahnuengx hujdengdeng naeuz: "Gou gwn imq lo, caiq gwn aendungx couh dek lo!"

"Gwn mbouj liux? Gwn mbouj liux daek baenz lai guhmaz? Gaijfangginh gaxgonq gwn naengfaex, ragnywj... naednaed haeux cungj dwg raemxhanh vuenh daeuj... vaiq gwn haeux ndaw vanj liux bae..." Gou bibi baba doiq dahnuengx gangj.

"Mbouj gwn, mbouj gwn, gou

mbouj gwn!" Dahnuengx mbwnj aenbak, ngauz aen'gyaeuj, raemxda youq gvaengzda aeng dwk.

"Ndei, mbouj gwn dwg ba, mbouj gwn gou couh mbouj hawj gwn saejdaez!"

"Mbouj gwn couh mbouj gwn, gou bae lwnh hawj daxmeh nyi." De itmienh daej, itmienh buet okbae lo.

"Mwngz—" Dahnuengx gingqyienz mbouj dingq vah gou, huj dwk gou conghndaeng cungj ok hoenz lo.

Daxmeh byaij haeuj ndaw ding, dahnuengx riengz youq baihlaeng uet dwk raemxda. "Bouxlawz heuh mwngz heifouh dahnuengx, bouxlawz heuh mwngz heifouh dahnuengx!" Daxmeh itmienh naeuz itmienh youq baihlaeng gou bek geij mbat. "Aeyo, aeyo..." Gou gyajcang in.

"Gaej daej lo, daxmeh moeb dahcej lo." Gangj sat, daxmeh youh nyeux gyaeuj yawj gou naeuz: "Mwngz heuh dahnuengx mbouj ndaej sai haeuxgwn dwg doiq, hoeng de lij iq, cij seiq bi, dauhleix hung de mbouj rox, mwngz wnggai ra fuengfap hab de daeuj son de..." Dwg ha, gij daidu gou gienq dahnuengx dwg miz di vwndiz.

"Dwg dahcej mbouj doiq, raeuz caez bae yawj dennauj, ndei lwi?" Daidu gou cienq ndaej gig vaiq, gou byaij bae coh dahnuengx, yaeng'yaeng lumh aen'gyaeuj de. Dahnuengx raen gou yienghneix, sikhaek riu lo. Ciepdkw, gou daj gwnzvangj ra gij doz mizgven mbouj miz doxgaiq gwn dungxiex okdaej, gangj gij goj doxgven haenx...

Mwh gwn haeuxcaeuz, dahnuengx gwn ndaej gig seuq. Gou ndawsim gag siengj, fuengfap ndei caen miz yungh ha.

(roek nienzgaep Cinz Vwnzvaz)

sij cozvwnz cingzgingj

Gaemdawz Song Mbiengj Cih "Caeuq"

抓住“和”字的两侧

Dangz cozvwnz cijdauj, lauxsae sien daezok gij iugouz baez cozvwnz neix: Daezmoeg "gou caeuq mouxmoux". Ndawde "mouxmoux" youz gak boux doengzhag gag dingh. Aeu youq gwnz gihcu j sij cingcu j saehcingz, biujyienh gij gamjcingz bouxvunz ndawde. Yienzhaeuh lauxsae cam gyoengq doengzhag: "Daihgya baenzlawz lijgaij diuz daezmoeg neix?"

Dangz Dahaij ndwn hwnjdaej naeuz: "Mouxmoux ndaw daezmoeg, yaeq dienz aencouh roxnaeuz cwngeuh boux vunz he. Lumj gou caeuq Ciz Swshwh, gou caeuq lauxsae, gou caeuq

daxboh cungj ndaej ba?"

Cinz lauxsae haengjdingh gij gangjap Dangz Dahaij le, youh cam: "Danghnaeuz sij 'gou caeuq daxboh', mwngz dajsuenq baenzlawz sij?"

"Gijneix mbouj nanz, doenggvaq geij gienh saeh biujyienh gij singgwz dwzcwngh daxboh couh ndaej lo." Dangz Dahaij naeuz.

Lauxsae mbouj bingzgyaq gij gangjap Dangz Dahaij, cix dwg cienq ndang cam Daegcoengh: "Mwngz nyinhnaeuz de gangj ndaej doiq lwi?"

Daegcoengh siengj le siengj naeuz: "Gou caeuq daxboh" mbouj dwg sij 'daxboh gou', gawq yaeq sij

'daxboh', hix yaeq sij 'gou'."

Lauxsae byaujyangz le Daegcoengh: "Doiq, ndaw cozvwnz mbouj ndaej noix 'gou'." Ciepdkw youh cam gyoengq doengzhag, "Mboujgvaq, Daegcoengh lij gangj mbouj cienz, byawz naengz caiq bouj gangj?"

Daihgya doigawj Liuz Yenz gangj, Liuz Yenz naeuz: "Lij haeusim cihsaw "caeuq". De biujyienh dwg gij saeh caeuq cingzgamj 'gou' caeuq 'daxboh', mbouj ndaej cijdwg mbiengj he doiq lingh mbiengj he, roxnaeuz song mbiengj mbouj miz lienzhaeh, wnggai daejyienh 'daxboh doiq gou' 'gou doiq daxboh' cungj



gamjcingz song mbiengj doxlienx haenx."

Lauxsae vih Liuz Yenz hoizdap haenx bekwngz: "Gangj ndaej gig doiq."

Ciepdkw lauxsae anbaiz daihgya itmienh siengj itmienh lied dizganh: "Siengjsiengj sou caeuq gij vunz lawz gvanhaeh cei q gaenjmaed; gij gvanhaeh gaenjmaed sou biujyienh youq gizlawz, lumj ndaw gwndaenj, ndaw hagsib daengjdaengj; youq song boux sou ndawde fatseng gvaq gij saeh lawz. Lied geij diemj okdaej, guh caizliu yaeq sij cozvwnz haenx.

(1)